

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 78 (1993)
Heft: 5

Artikel: Baselgia en crisa
Autor: Martin, Pelican G.
DOI: <https://doi.org/10.5169/seals-882629>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Baselgia en crisa



G. Martin Pelican

Strusch scret il tetel (daus a mi) vegn jeu gia en difficultads. Tgei segn duei jeu far alla fin: In'enzenna d'exclamaziun ni in'enzenna da damonda? Sche jeu fetsch in'enzenna da damonda vegnan biars a sevilar: Biala damonda. Matei che la Baselgia ei en crisa! E sche jeu fetsch in'enzenna d'exclamaziun vegnan auters a seriscuder buca meins dad ault: Quei ei puspei tipic. Ins dramatisescha adina, per che la glieud creigi ch'ei seigi veramein aschia. Perquei lasch jeu il tetel aschia sco el ei - mintgin sa, suenter haver legiu igl artechel, far tgei enzenna ch'el vul.

Crisa: Tgei ei quei?

Il plaid crisa vegn duvraus dètg savens, magari era senza propri saver tgei ch'el munta. Il plaid vegn dil grec, ni aunc pli precis dil lungatg grec da dertgira, e munta atgnamein decisiun. Il derschader sto decider sur d'in fatg, el sto sedecider per ina dallas variantas presentadas ad el. La medema muntada ha il plaid oz, sch'ins discuora dalla crisa d'in malsaun: Oz sto ei sedecider, schebein la malsogna damogna, ni sche las forzas saunas dil carstgaun ein pli fermas.

Aschia eis ei era tier la Baselgia, en nies cass la Baselgia catolica. La Baselgia sesanfla en ina situaziun delicata e prigulusa. Ed ussa stuess ei sedecider, schebein ei va silla buna vart ni plitost silla mala. La crisa ei da principi buca enzatgei negativ.

La Baselgia ei ina cuminonza da carstgauns, ina instituziun per carstgauns. Perquei eis ella era suttaposta allas tendenzas e situaziuns dil temps. E la tendenza da nos dis ei generalmein quella ch'ins fida buca pli ch'in ton a quels che stattan alla testa d'ina cuminonza e ch'ins s'empatscha insumma pauc da cuminonzas. Il carstgaun dad oz ei plitost in individualist. El s'occupescha plitost da ses fatgs e

quitaus. Ed el giudichescha era las caussas tenor siu beinmanegiar e buca tenor devisas ni schizun ordas dadas da surengiu. Quei vesein nus claramain els resultats da votaziuns. Cheu decidan adina meins las parolas da partida, mobein quei che mintgin pren sez per bien e gest. Consequentamein dat ei oz sin tut ils camps dalla veta ina schinumada crisa d'autoridad.

Daco duess ei esser auter ella Baselgia?

Quei che vala per la gronda politica, vala era per la Baselgia. Per part ein quels che stattan alla testa sez la cuolpa ch'igl ei vegniu aschia. Memia ditg han els priu il pievel per pauc intelligents, han cartiu da stuer dir e dictar tgei che seigi bien per el.

Ils temps semidan

La Baselgia ha ina structura monarchica dapi igl imperatur Constantin, q.v.d. mo in decida e camonda. Ei dat era tals che pretendan che Cristus hagi vuliu quei aschia. Mo Cristus ha buca detg a Pieder: Camonda sin tes frars! mobein: Fortifichescha tes frars (Lc 22, 32).

La concentrasiun da tutta pussonza ecclesiastica en in carstgaun, ni silmeins en in liug, sesviluppescha pli e pli duront ils tschentaners, tochen tier la culminasiun a caschun digl emprem concil dil Vatican sut Papa Pius IX. La revoluziun franzosa cun la propagaziun dils dretgs dil singul ha pia giu tut auter che ina conseguenza positiva ella Baselgia catolica. Mo la roda dil temps selai buca menar anavos, silmeins buc a liunga vesta. Per quei eis ei buca da smarvegliar ch'il davos concil dil Vatican ha procurau per ina correctura, schegie buca ella davosa conseguenza. Aschia resta la pussonza buca mo tier il Papa, mobein vegn relativada en favur dil collegi dils uestgs (era sch'ins senta sut il Papa actual pauc da quella nova vesta). Ed ils fideivels daventan, el lungatg dil concil, il pievel da Diu. La dignitad dil singul vegn puntuada, la cunscienza dil singul vegn prida seriusa sco autoritad suprema per las decisiuns dil carstgaun. Ils teologs vegnan respectai en lur lavur scientifica ed en lur libertad academica, quei che vegn denton restrenschiu buca pauc cuort suenter il concil.

In auter fenomen da quest tschentaner: La Baselgia senumna buca per nuot roman-catolica. Roma era il center. Tenor quei center veva tut da sedrizzar, buca mo en caussa da disciplina, mobein era en fatgs da ductrina. La Baselgia era ina caussa europea, e tut tgi che era ni daventava catolics stueva per aschidadir daventar in Europè. Consequentamein deva ei per Roma negina autra pusseivladad da ludar Diu (liturgia) che la fuorma europea-romana. Cun il svilup dils pievels dil mund en nies tschentaner ei quei vegniu tut auter. La Baselgia ei buca pli europea, mobein «catolica», q.v.d. ella ensiara tut ils pievels dil mund, ella daventa mundiala.

Mo las decisiuns vegnan vinavon pridas a Roma. Sto quei buca provocar conflicts? Tuttavia sut in Papa schi autoritar sco Gion Paul II.

Ed in tierz aspect: Buca mo la schientscha e valur dil singul ei carschida, mobein

era la schientscha dalla femna enteifer la societad. Il temps che teologs renomai savevan pretender che la femna hagi buca olma ein bein vargai, denton la situaziun dallas femnas ella Baselgia semida mo vesamein. Dall'entschatta enneu ei la Baselgia dominada dad umens. Buca mo s. Paul scheva che la femna hagi da quescher ella raspada!

Ils davos decennis han denton dau ina viulta recenta. La damonda seigi lubida: Ei quei era il cass ella Baselgia?

Ils segns dil temps ein buca vegni capi

Las midadas han automaticamein stuiu provocar conflicts. Il singul cartent vul haver in plaid en capetel (quei ussa el ver senn dil plaid). El vul era cundecider cura ch'ei setracta da caussas che pertuccan el e sia cunscienza. Ed ils biars ein buca prompts da semplamein sbassar il tgau, sco quei che la plipart dils uestgs fa, cura ch'ei vegn ina cunzina da Roma. Igl ei strusch da crer con pauc udida ch'il singul anfla enteifer la Baselgia, q.v.d. tier l'autoridad suprema, nun ch'el plaidi devotamein sco quei ch'ils da sura spetgan ch'el fetschi.

Nus vein giu en Svizra ina Sinoda 72 che ha dau fermes impuls alla veta ecclesiastica da gliez temps. Ed oz? Ins ha l'impressiun che tut seigi satrau. Jesus ha a sias uras fatg la reproscha a siu pievel ch'el seigi buca habels da capir ils segns dil temps. Eis ei lu garmadi sche nus fagein mintgaton la medema reproscha al Vatican?

Ni ein ils segns dil temps vegni capi, sch'ins sa edir in catechissem mundial en quella maniera sco quei ei succediu da cuort? Las ideas dil temps vargau vegnan cementadas senza ditgar dils problems effectivs da nos dis, sco p.ex. las damondas socialas, l'uiara, l'ecumena e.a.v. Ils segns dil temps ein buca vegni capi, sche la teologia da liberaziun, naschida e sviluppada el tierz mund, vegn cumbattida cun tuts mieds pusseivels. Ins vegn bein strusch a saver pretender ch'ins hagi capiu ils segns dil temps sch'ins sa scriver en quei catechissem niev davart l'ordinaziun dalla femna: Pervia da quei che Cristus ha fatg «eis ei buca pusseivel d'ordinar femnas». Pli apodicticamein san ins buca dir quei. Perfin las buca feministas vegnan a scurlar il tgau.

E nua vegnan ils teologs pri serius en quei catechissem? Gnanc in ei risguardaus. Tenor quei catechissem capeschan mo Roma ed il Papa enzatgei da teologia. Teologs e professers han buca plaz cheu.

Ins ha era strusch capiu ils segns dil temps sch'ins ei buca el cass en priedis ed enciclicas da far ina differenza denter la regulaziun dallas naschientschas entras mieds anticoncepziunals e la scatschada digl affon. Talas ductrinas che sebasan sin teorias e teologias antiquadas ein per part era la cuolpa ch'il sempel cartent fa buca las differenzas necessarias e fa buca stem pli da quei che vegn da Roma. Buca dil tut senza raschun di H. Küng ch'ins concedi indirectamein cun la davosa enciclica

che l'entira ductrina ch'il Papa propaghescha cun insistenza sin ses viadis seigi in fiasco total.

Ins sa pia ruasseivlamein dir che la Baselgia seigi en ina crisa, buca per l'emprema ga. Bein savens ein la direzia e nunmovibladad da Roma stadas la raschun che la crisa ei ida ora en mal. En vesta allas differenzas (pauc teologicas) denter las Baselgias orientalas e quellas occidentalas ei Roma stada fideivla a siu principi: Nus cumandein, e vus veis d'obedir. La consequenza: igl entir Orient ei seseperaus da Roma. In fatg ch'ei aunc oz disastrus per il cristianissem.

Dil temps da Luther eis ei stau semeglient. Enstagl d'enconuscher ils segns dil temps ha Roma excommunicau Luther. E miez dall'Europa ei stada separada dalla Baselgia catolica. Quei malgrad ch'ei veva dau cuort avon in concil che veva formulau decrets da refuorma.

Oz ein ins sin via da piarder ina gronda part dils pli fideivels ella Baselgia - las dunnas - sch'ins ei buca prompts da dar ad ellas ina posiziun adeguata. Ins gudogna buca las dunnas cun strapazzar il maletg surfatg da Maria e presentar quel sco sulet ideal. Ins ha buca darar l'impressiun che la veneraziun da Maria stoppi remplazzar quei ch'ins negligescha visavi tut las autras femnas.

Ed en quei connex stuess ins era numnar il problem dil celibat. Da quella lescha ei buca mo sortiu dil bien, schegie che biars pretendan quei. Buca il celibat sco tal duess esser igl intent dil sacerdozi. Il scopo dil sacerdozi ei da procurar ch'il pievel da Diu sappi s'entupar cun Cristus ell'eucaristia. Sch'il celibat ei la cuolpa che tontas e tontas pleivs ein senza spiritual e consequentamein senza eucaristia, sto la lescha dil celibat silmeins vegnir curregida. Quei ei era in segn dil temps.

Ponderaziuns finalas

La cuolpa dalla crisa dalla Baselgia ein denton buca mo quels che stattan alla testa da quella. Era mintga singul ei culponte. Sche nus vulein sortir sauns da quella crisa, stuein nus enconuscher e conceder ch'il carstgaun ei buca igl esser suprem, la autoritad suprema. Cristus ei l'autoritad. Quei vala per mintgin, per il sempel cartent, per mintga uestg, ed era per il Papa. Sche nus manegein che nus haveien adina raschun en tut quei che nus prendein per bien, lu ei quei falliu. Negin ha priu a tscheins la verdad. Quella san ins mo encurir. Buca vuler admetter ch'ins ei in puccont che sto adina puspei seconverter, ei garmaschia. Mo Cristus sa dir: Jeu sun la verdad. Quei ch'igl uestg da Friburg ha detg cura ch'el ha presentau la davosa enciclica fa perquei smarvegliar - ed jeu ughegel da pretender ch'ei seigi ina hereisia: «Ussa san ins buca dir pli 'il Papa ha detg', mobein sto dir 'Cristus ha detg'!» Tgei enorma garmaschia - e quei mo smasa la vera autoritad.

Igl ei la medema garmaschia che ha menau alla crisa (ch'ins sto bunamein numnar catastrofala) en nies uestgiu. Sch'in uestg fa orda sesez in (miez) diu che sto buca pli respectar la dignitad dil carstgaun, lu eis el buca merets ch'enzatgi

respecti l'autorità ch'el pretenda per sesez. – Quei ei la crisa gronda.

Jeu less pretender che la crisa dalla Baselia seigi surtut ina crisa dalla verdeivladad. E Baselia essan nus tuts. Pia stuessen nus tuts esser verdeivels e carteivels en tut quei che nus fagein. E carteivels essan nus (ils pigns ed ils gronds) sche nus manegein buca dad esser patrunds dalla Baselia e possessurs dalla verdad entira ed entratga. Carteivels e verdeivels essan nus sche nus essan cuntinuadamein alla tscherca dalla verdad. – Tut igl auter vala nuot!

